



Broj: 01/5-50-1-6-10/07
Sarajevo, 31.10.2007.godine

Z A P I S N I K
10. sjednice Komisije za saobraćaj i komunikacije,
održane 31.10. 2007. godine

Sjednica je održana 31.10.2007., s početkom u 12,10 sati.

Sjednici su prisustvovali članovi Komisije:

1. Branko Dokić, predsjedavajući
2. Šemsudin Mehmedović
3. Slavko Matić
4. Mehmed Suljkanović
5. Selim Bešlagić

Opravdano su odsustvovali: Snježana Rajilić, Husein Nanić, Savo Erić i Sadik Bahtić.

Iz Vijeća ministara BiH sjednici je prisustvovao Veselin Poljašević, zamjenik ministra komunikacija i prometa BiH, i Miodrag Pandurević, pomoćnik ministra civilnih poslova BiH, iz Javnog RTV servisa BiH Nikola Deretić, predsjedavajući Upravnog odbora, te iz Regulatorne agencije za komunikacije BiH Helena Mandić i Emir Povolakić, članovi Radne grupe za tehničku podršku Komisije za utvrđivanje rang-liste kandidata za Upravni odbor BHRT-a.

Sjednici je prisustvovao i sekretar Komisije za saobraćaj i komunikacije Ahmed Jalovičić.

Predsjedavajući je predložio sljedeći

D N E V N I R E D

1. Usvajanje Zapisnika 9. sjednice Komisije;
2. Prijedlog zakona o izmjenama i dopunama Zakona o putnim ispravama BiH - predlažać: Vijeće ministara BiH (prva faza);
3. Razmatranje Izvještaja o radu Upravnog odbora Javnog radiotelevizijskog servisa BiH;
4. Razmatranje rang-liste kandidata za člana Upravnog odbora Javnog radiotelevizijskog servisa BiH iz bošnjačkog naroda;
5. Tekuća pitanja.

Dopunjeni dnevni red jednoglasno je usvojen.

Ad. 1.

Šemsudin Mehmedović istakao je da ima primjedbu na Zapisnik koja je suštinske prirode, jer je 9. sjednica Komisije imala tri tačke dnevnog reda a da je treća tačka dnevnog reda bila tekuća pitanja, pa je naknadno rečeno da se pod ovom tačkom razmatra i zahtjev autoškola za izmjenu Zakona o osnovama

sigurnosti saobraćaja na putevima u Bosni i Hercegovini. U Zapisniku 9. sjednice stoji da je kao posebna tačka dnevnog reda uvrštena izmjena Zakon o saobraćaju, što ne odgovara stvarnom stanju, jer je pod tačkom razno usvojen zaključak da se sačini tekst zakona, pa da se tek onda Komisija izjasni. S obzirom da je već dobio Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini za razmatranje po hitnoj proceduri i da je predlagač Komisija, predlaže da se ovaj prijedlog zakona uvrsti u dnevni red današnje sjednice.

Predsjedavajući je ukazao da je Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini uvršten kao tačka dnevnog reda 9. sjednice Komisije i da je konsenzusom dogovoreno da se uradi Prijedlog zakona, kako bi se mogao razmatrati na sjednici Predstavničkog doma, čije je održavanje bilo planirano 30. oktobra.

Na prijedlog Šemsudina Mehmedovića, Komisija je jednoglasno odlučila da se dopuni dnevni red 10. sjednice i da se kao **treća tačka dnevnog reda uvrsti Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini – predlagač: Komisija za saobraćaj i komunikacije Predstavničkog doma.**

Tačka 3. usvojenog dnevnog reda postaje tačka 4., tačka 4. postaje 5. i tačka 5. postaje tačka 6.

Ad. 2.

Predsjedavajući je podsjetio da se danas razmatraju samo principi Prijedloga zakona o izmjenama i dopunama Zakona o putnim ispravama (u daljnjem tekstu: Prijedlog zakona), te dao riječ predlagaču.

Miodrag Pandurević istakao je da je suština predloženih promjena uvođenje obaveznog davanja biometrijskih podataka, te da Prijedlog zakona ne odstupa od principa osnovnog Zakona o putnim ispravama.

Nakon provedene rasprave, članovi Komisije jednoglasno su podržali principe Prijedloga zakona.

Ad. 3.

Mehmed Suljkanović istakao je da, uzimajući u obzir peticiju saobraćajnih inženjera, predlaže da se Prijedlog zakona razmatra po skraćenoj proceduri, kako bi Komisija imala vremena da dobije potpunije podatke.

Šemsudin Mehmedović podržava prijedlog da se Zakon razmatra po skraćenoj proceduri, te predlaže da se na sljedeću sjednicu Komisije pozovu predstavnici autoškola i saobraćajnih inženjera, kako bi se raspolagalo tačnim podacima, jer ima informaciju da se najviše osporava stav 2. Prijedloga zakona, koji se odnosi na prijelazni period za lica sa srednjom stručnom spremom.

Selim Bešliagić smatra da bi bilo korisno imati podatke o broju saobraćajnih inženjera, te podržava prijedlog za skraćenu proceduru.

Slavko Matić podsjetio je da su se članovi Komisije na prošloj sjednici konsenzusom dogovorili da je neopravdano da samo saobraćajni inženjeri imaju mogućnost da budu predavači teoretske nastave iz oblasti saobraćajnih propisa, te je konstatirao da je i u Hrvatskoj omogućeno obavljanje ovih poslova licima s višom stručnom spremom. Što se tiče prijelaznog perioda za lica sa srednjom stručnom spremom, istakao je da se Komisija rukovodila primjerom državnih službenika s višom spremom, kojima je omogućen prijelazni period da steknu visoku spremu, pa ne vidi razloga da se to ne primijeni i u ovom slučaju. Mišljenja je da u ovom trenutku postoje dvije opcije i to da Komisija odluči da se Prijedlog zakona razmatra po skraćenom postupku ili da se o Prijedlogu zakona raspravlja na sljedećoj sjednici.

Predsjedavajući je istakao da je Prijedlog zakona sačinjen u skladu s dogovorenim na sjednici Komisije, da je potrebno da se napravi transkript diskusije na 9. sjednici, te predlaže da se Prijedlog zakona razmatra na sljedećoj sjednici koja će se održati 12. novembra.

Mehmed Suljkanović ukazao je da ne vidi razlog da se Prijedlog zakona povlači iz procedure, jer svaki član Komisije može predložiti takav zakon, kao i da je bolje da se predloži skraćena procedura.

Komisija je jednoglasno zaključila da se Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini razmatra na sljedećoj sjednici Komisije.

Ad. 4.

Predsjedavajući je dao riječ predstavniku BHRT-a.

Nikola Deretić istakao je da je raniji Izvještaj dopunjen sa 10 strana, koje sadrže program aktivnosti Upravnog odbora u protekloj godini, da su obrazloženi razlozi za smjenu generalnog direktora BHRT-a, da su navedeni najbitniji problemi koje je uočila revizija, kao i potrebe njihovog otklanjanja. Ukazao je da se sutra održava sjednica Upravnog odbora na kojem će menadžment dostaviti elaborat o načinu prevazilaženja postojećeg stanja, te da će se 12. novembra održati sjednica Upravnog odbora Javnog RTV sistema, gdje će se prevashodno rješavati pitanja unutrašnjeg dugovanja i problemi marketinga. Ukoliko se ubrzo ne donesu radikalni zaključci i ne počne se štiti interes BHRT-a putem zakonskih mjera, može se doći u situaciju u kojoj se nalazi Federalna televizija.

Na pitanje predsjedavajućeg zašto Izvještaj nije potpisan, Nikola Deretić odgovorio je da će Izvještaj biti potpisan sutra na sjednici Upravnog odbora, te da Izvještaj neće potpisati Plamenko Čustović koji smatra da Izvještaj nije u skladu sa zakonom.

Šemsudin Mehmedović ukazao je da je potrebno riješiti problem nepostajanja baze podataka RTV takse, jer se s pravom sumnja u način naplate takse, jer uopće nema podataka o naplati posredstvom inkasanata. Mišljenja je da nije tačan podatak da nije izbalansirana nacionalna struktura na BHRT-u, kao i da bi se uspostavljenjem Korporacije javnih RTV servisa riješili mnogi problemi. Izrazio je nezadovoljstvo činjenicom što bošnjački član ne učestvuje u radu Upravnog odbora, pa zbog svega navedenog neće podržati usvajanje Izvještaja.

Nikola Deretić istakao je da, dok se ne usvoji Zakon o Javnom RTV servisu Federacije BiH, nema uslova za formiranje Korporacije, kao i da je pravna služba Ministarstva komunikacija i prometa BiH dostavila mišljenje da se ne mogu donositi odluke bez novog Upravnog odbora Federalne televizije. Podaci o nacionalnoj strukturi dati su iz kadrovske službe BHRT-a, a stav je Upravnog odbora da BHRT mora odražavati narode koji žive na ovim prostorima.

Na pitanje Selima Bešlagića zašto Plamenko Čustović nije učestvovao u donošenju Izvještaja, Nikola Deretić odgovorio je da je Upravni odbor tražio od Ureda za reviziju finansijskog poslovanja institucija BiH da izvrši reviziju poslovanja BHRT-a, a da je stav Plamenka Čustovića da to nije u skladu sa zakonom, jer smatra da je jedino nezavisna revizorska kuća ovlaštena da izvrši reviziju poslovanja BHRT-a.

Mehmed Suljkanović istakao je da je neshvatljivo da telekom operateri naplaćuju RTV taksu, a da onaj za koga naplaćuju nema uvida u to. Mišljenja je da bi trebalo organizirati posebnu sjednicu Predstavničkog doma posvećenu radu BHRT-a, čime bi se ukazalo na ozbiljnost situacije.

Nakon rasprave o ovoj tački, Komisija je, s dva glasa „za“, jednim „protiv“ i dva „suzdržana“, prihvatila Dopunjeni izvještaj o radu Upravnog odbora BHRT-a, pa predlaže Predstavničkom domu njegovo usvajanje.

U smislu odredbi člana 113. Poslovnika Predstavničkog doma Parlamentarne skupštine BiH, za izvjestioca u plenarnoj fazi imenovan je predsjedavajući Komisije Branko Dokić.

Ad. 5.

Predsjedavajući je ukazao da je Regulatorna agencija za komunikacije (u daljnjem tekstu: Agencija) dostavila Parlamentarnoj skupštini BiH rang-listu kandidata za člana Upravnog odbora i dao riječ predstavnicima Agencije.

Helena Mandić istakla je da je Agencija nadležna za utvrđivanje rang-liste za člana Upravnog odbora BHRT-a, podsjećajući da je prestao mandat članu iz bošnjačkog naroda, pa je Agencija provela odgovarajuću proceduru, vodeći se standardima i rokovima propisanim u Zakonu o ministarskim imenovanjima Vijeća ministara BiH. Komisiju za utvrđivanje rang-liste kandidata za imenovanje člana Upravnog odbora osnovalo je Vijeće Agencije, a Komisiju čine tri člana Vijeća Agencije i dva člana iz nevladinih organizacija, koji imaju odgovarajuće iskustvo o funkcioniranju javnog emitiranja. Komisija je utvrdila rang-listu u skladu s traženim uslovima iz konkursa i dostavila je Vijeću Agencije uz izvještaj o radu Komisije, a Vijeće je rang-listu prosljedilo Parlamentarnoj skupštini BiH na usvajanje.

Na pitanje predsjedavajućeg koliko je bilo kandidata, Helena Mandić odgovorila je da se prijavilo 10 kandidata.

Na pitanje Šemsudina Mehmedovića da li je obavljen intervju sa svim kandidatima koji ispunjavaju formalno-pravne uslove, Helena Mandić odgovorila je da je obavljen intervju s kandidatima koji su na rang-listi, jer je u konkursu navedeno da će biti pozvani na intervju samo oni koji uđu u uži izbor, što je u skladu sa Zakonom o ministarskim imenovanjima Vijeća ministara BiH.

Na pitanje Selima Bešliagića da pojasni redoslijed kandidata s rang-liste, Helena Mandić odgovorila je da je redoslijed u skladu sa ocjenama, da je prvi kandidat najbolje ocijenjen od Komisije i tako redom.

Nakon rasprave o ovoj tački, Komisija je jednoglasno prihvatila rang-listu kandidata za člana Upravnog odbora Javnog radiotelevizijskog servisa Bosne i Hercegovine iz bošnjačkog naroda, te predlaže Predstavničkom domu da, u skladu s članom 26. stav 1. Zakona o Javnom radiotelevizijskom servisu BiH, imenuje člana Upravnog odbora s rang-liste kandidata koji su ušli u uži izbor.

Ad. 6.

Predsjedavajući je ukazao da je Komisiji dostavljena inicijativa za izmjenu Zakona o poštama BiH – podnesena od „Pošte Srpske“ a.d. Banja Luka, „JP BH POŠTA“, d.o.o. Sarajevo i HP Mostar, d.o.o.; i informacija Vanjskotrgovinske komore BiH - Smanjenje carinske stope na uvoz tegljača, te predlaže da se ova pitanja razmatraju na sljedećoj sjednici Komisije.

Šemsudin Mehmedović istakao je da se u informaciji Vanjskotrgovinske komore BiH navode visoki iznosi administrativnih taksi na CEMT dozvole, kao i da bi trebalo razmotriti nepoštivanje zaključaka Komisije od Ministarstva komunikacija i prometa BiH.

S obzirom da nije bilo više pitanja, predsjedavajući je zaključio sjednicu u 13,45 sati.

SEKRETAR KOMISIJE
Ahmed Jalovičić

PREDSJEDAVALAJUĆI KOMISIJE
dr. Branko Dokić